

## Hier staan ons: ons kan nie langer stilbly nie!

*“Julle moet maar self besluit wat voor God reg is: om aan julle gehoorsaam te wees of aan God. Wat ons betref, dit is onmoontlik om nie te praat oor wat ons gesien en gehoor het nie.”* Dit was die antwoord van Johannes en Petrus, twee eenvoudige gelowiges, toe die magtige geleerde Joodse Raad hulle wou belet om van Jesus te getuig. (Hand 4:19-20).

Met hierdie woorde van die twee apostels wil Koinonia Sinode getuig terwille van die waarheid van die Evangelie, asook in antwoord op dreigemente teen ons. Hier staan ons, ons kan nie langer stilbly nie! Ons antwoord en getuig nie uit selfvoldaanheid of dapperheid nie, intendeel ons doen dit in nederige afhanklikheid van die Heilige Gees wat ons daartoe oortuig. Ons is ook diep bewus van die apostel Paulus se waarskuwing waar hy sê: “Almal wat in Christus Jesus toegewy aan God wil lewe, sal ook vervolgd word. Maar goddelose mense en bedrieërs sal voortgaan van kwaad tot erger. Hulle mislei ander en word self mislei. Maar jy, bly by wat jy geleer het en wat jy vas glo. Jy weet tog wie jou leermeesters was en jy ken van kleins af die heilige Skrif. Dit kan jou die kennis bybring wat tot verlossing lei deur die geloof in Christus Jesus. Die hele Skrif is deur God geïnspireer en het groot waarde om in die waarheid te onderrig, dwaling te bestry, verkeerdhede reg te stel en 'n regte lewenswyse te kweek, sodat die man wat in diens van God staan, volkome voorberei en toegerus sal wees vir elke goeie werk.” (2 Tim 3:12-17).

As behoudende lidmate van die NG Kerk erken ons met groot dank hoe die Here die NG Kerk vir baie jare lank in Sy diens geseën het deur ongekende vrug te gee op haar sending en evangelisasie asook barmhartigheidsdiens op byna alle terreine waar daar nood was. Om jare lank deel te wees van so 'n Skrif-getroue en roepingsbewuste kerk, was vir ons 'n eer en voorreg. Ons is ook dankbaar dat daar vandag nog steeds kansels in die NG kerk is vanwaar die Woord en sakramente suiwer bedien word - so is daar ook nog duisende lidmate wat vashou aan die suiwer leer wat hulle van kleins af in hierdie kerk geleer het. Maar ongelukkig het die wiel gedraai. Liberale teoloog en humanistiese menseregte aktiviste het, geleidelik ingesypel tot op ons kansels en ook in ander sleutel-rolle in die kerk. Onder hulle invloed is 'n groot deel van die NG Kerk op 'n glybaan geplaas om ons gereformeerde identiteit prys te gee. Mens moet vandag al verder soek om hier nog iets van ons geloofsbelydenis se kenmerke van die ware kerk te vind. Sinodale besluite oor leer en lewenswandel word nie meer uitsluitlik op grond van die Bybel geneem nie. Volgens die 2030 droom-scenario moet die NG Kerk getransformeer word tot 'n “ruim huis” wat die diversiteit van die samelewing reflekteer. Daarom word sinodale besluite al meer geneem om die publieke opinie, die tydgees en die openbare media se goedkeuring te kry.

Ons getuienis is egter nie gerig teen die NG Kerk as sodanig nie, want daarvan is ons nog deel, maar teen die liberale indringers wat reeds verskeie kansels en sinodale vergaderings gekaap het. In nederige erkenning van ons eie sonde en gebreke, wil ons vandag getuig: Hier staan ons...

1. Al ons pogings om beswaar te maak teen verskeie on-Skriftuurlike besluite van die Algemene Sinode het op dowe ore geval het. Daarom verklaar ons nou getrou aan Artikel 23.1 van die kerkorde al daardie on-Skriftuurlike besluite as nietig asof dit nie bestaan nie.

2. Die Algemene Sinode het sy kerkordelike roeping om die NG Kerk se beleid noukeurig in ooreenstemming met die Skrif en die gereformeerde belydenisse te formuleer (KO art 1 en 43) amptelik versaak. Inplaas daarvan het hulle die kerk tot openbare spot gemaak deur verskeie besluite te neem wat in stryd is met die Woord. By implikasie het die AS daardeur nou sy voorreg as beleidmakende sinode van die NG Kerk geabdikeer. Ons is oortuig die rakleef tyd van die AS is verstreke.

3. Ten spyte van Kairos Netwerk se herhaalde skriftelike versoeke aan die ASM tot mediasie om die krisis aan te spreek, was die versoeke telkens deur hul dagbestuur botweg geweier. Hierdeur het hulle ook hul plig om as tussentydse gevolmagtigdes van die Algemene Sinode en hul voorreg as diensknegte en leiers in die kerk van Christus verbeur.

## Hier staan ons: ons kan nie langer stilbly nie!

4. Die Algemene Sinode se besluite van 2019 kom daarop neer dat leraars en kerkrade wat selfdegeslagverbintenisse kerklik (volgens die huwelikswet van Binnelandse Sake) wil bevestig, dit doen met die goedkeuring van die Algemene Sinode, en dat hulle selfs \*n formulier sal opstel om die NG Kerk se goedkeuring daarop te plaas. Dit beteken sonder twyfel dat die Algemene Sinode namens die NG Kerk hul seën geplaas het op selfdegeslag seksuele verhoudings, gelyk aan die verhouding in 'n huwelik tussen man en vrou. Die troos dat dit nie 'n huwelik genoem word nie en dat kwansuis neutraal daarteenoor staan en geen kerkraad gedwing word om dit te doen nie, is uiters misleidend. Dit neem niks weg van die ware intensie van sulke verhoudings en van die feit dat die Algemene Sinode dit amptelik goedkeur en sy seën daarop plaas nie.

5. Bogenoemde besluite van 2019 was die laaste finale bewys dat die Algemene Sinode gekies het vir 'n "ruim huis" wat baie ruimer is as die Here se Woord, en vir 'n on-Bybelse eenheid ten koste van die waarheid.

6. Die kerk se missionêre opdrag in die Skrif om dissipels te maak van alle nasies deur die Evangelie te verkondig en mense tot geloof en bekering te lei, is besig om in die NG Kerk plek gemaak vir 'n humanistiese "missionale teologie" waar meer klem gelê word op horisontale hulp, menseregte en politieke regte as op die verlossing van sonde deur geloof en bekering.

7. Ons is oortuig dat diegene wat weier om hulle te bekeer, hulle reg op leierskap binne die Ned. Geref. Kerk prysgegee het. Ons verbind ons om met behoudende NG gemeentes saam te werk aan reformasie op Bybelse grondslae van binne die kerk.

8. Ons betreur dit dat leraars en teologiese dosente van die NG Kerk sonder dat die nodige kerklike opsig en tug oor hulle toegepas word, rustig kan voortgaan met hul kerklike werk terwyl hulle selfs die sentrale waarhede van die christelike geloof verwerp. Dit is sake soos die historiese sondeval van Adam en Eva, die Bybel se leer van die erfsonde, die totale verdorwenheid van die mens, die enigste weg tot verlossings deur geloof in Christus. Ook sake soos Jesus se maagdelike geboorte, Sy plaasvervangende versoening, Sy opstanding uit die dood en Sy wederkoms.

9. Ons pleit dat die NG kerk so gou moontlik sy erkenning van die huidige teologiese opleiding by die drie staatsbeheerde teologiese fakulteite sal staak en sal toesien dat voornemende leraars elders

deeglike gereformeerde teologiese opleiding sal kry. Skrif-getroue gemeentes is reeds 'n geruime tyd besig om met behoudende teologiese sentra te onderhandel met die oog op ons pad vorentoe.

Ons sou egter verkies dat die ganse NG kerk hierdie kopskuif moet maak.

10. Teenoor vals beskuldigings teenoor Kairos Netwerk en Koinonia Sinode wil handel soos die Woord ons leer in Romeine 12:14 "Seën julle vervolgers; ja, seën hulle, moet hulle nie vervloek nie." Ons opregte gesindheid teenoor hulle en ook teenoor alle gay lidmate is duidelik dat as christene ons alle mense, selfs die grootste sondears met liefde en respek wil hanteer, maar sonder om die sonde goed te praat. Die feit dat die Algemene Sinode egter sy seën geplaas het op die lewenswyse van praktiserende homoseksuele lidmate is uiters wreed en liefdeloos. Dit ontnem sulke mense die voorreg van bevryding deur sondebelydenis en bekering.

11. Daar het versoeke gekom om nouer skakeling met erkende Gereformeerde kerke binne en buitelands. (Sien aanhangsel) Behoudende gemeentes verstaan dat elke gemeente volledig liggaam

van Christus is maar dat ons nie alleen in die liggaam is nie. Uitdagings dwing ons om hierdie uitnodigings ernstig op te neem.

12. Koinonia Sinode sal in die belang van die ware kerk werksaamhede voortsit met die oog op die behoud en die heil van die ware kerk Koinonia Sinode nooi alle NG lidmate en gemeentes wat wil saamwerk en bid vir reformasie van binne om ons (KSDG) Koinonia Sinode Diensgroep te kontak.

**Gemeentes is versoek om hierdie dokument intern te bespreek en self te besluit oor verdere verspreiding.**